

भारतीय संस्कृति आरो प्रकृति के संदर्भ में अंगिका उपन्यासों में नारी चेतना

डॉ० गौतम कुमार यादव¹

प्राप्ति: 9 अगस्त 2026 / स्वीकृत: 17 अगस्त 2026 / प्रकाशित ऑनलाइन: 18 अगस्त 2026

Copyright © 2026 Author(s). Published by Siri Research Foundation. This is an open access article distributed under the Creative Commons Attribution International License (CC BY 4.0).

सारांश

हिन्दी उपन्यासों में नारी चेतना अक्सर महानगरीय आरो बौद्धिक बेसी होय छै, जबे कि अंगिका उपन्यासों में ई माटी के गंध आरो पेट के भूख से जुड़ल होय छै। यहाँकरो नारी लिबरेशन शब्द नै जानै छै, मतरकि वें अपनो हक के लेली लड़ै ले जानै छै। अंगिका उपन्यासों में नारी के एकटा नया आकाश देनै छै, मतरकि अभी कई कोस चलना बाकी छै। अंगिका उपन्यास विधा में पुरुषों के वर्चस्व रहल छै। सुमन सूरु, डॉ. तेजनारायण कुशवाहा, आमोद कुमार मिश्र, अनिरुद्ध प्रभास, अनिरुद्ध प्रसाद विमल, विजेता मुदगलपुरी, अरुणेन्द्र भारती, डॉ. अमरेन्द्र, रंजन आरन्हीं अपनो पहचान स्थापित करनै छै। वहे रं जबे तौय बेसी संख्या में नारीसिनी अपनो कलम नै उठैतै, तबे तौय नारी चेतना केरो एक पक्ष हमेशा ओझल रहतै। क्षेत्रीय भाषा हुवे के कारण अंगिका उपन्यास आरो एकरो रचना के पहुँच बहुत कम छै। जेकरो कारण स्त्री विमर्श व्यापक फलक पे नै आबै पारै छै।

अंगिका उपन्यास साहित्य में नारी चेतना एकटा ऐहनो यात्रा छिकै जे दासी से शुरू होयके व्यक्ति तौय पहुँचै छै। ई बिहुला के ऊ संघर्ष रो आधुनिक संस्करण छिकै, जहाँ हुनी मौत के खिलाफ नै, मतरकि ऊ समाज के खिलाफ खाड़ो छै, जे ओकरा दोयम दर्जा के नागरिक मानै छै। अंगिका के उपन्यासकार मुबारकवाद के पात्र छै, कँहे कि हुनी ऊ मौन के तोड़नै छै, जे सदियों से अंग प्रदेश के गलीसिनी में गुंजी रहल छेलै। ये लेली ई कहल जाबै सकै छै कि अंगिका साहित्य अबे केवल मनोरंजन के साधन नै रहीके ऊ सामाजिक परिवर्तन के एकटा सशक्त औजार बनी गेलो छै। नारी चेतना अंगिका साहित्य के ऊ मसाल छिकै, जे आबै वाला समय में अंग प्रदेश के सामाजिक ढाँचा के नया रूप देतै।

बीज शब्द: संस्कृति, फेमिनिज्म, मंजूषा कला, मर्मस्पर्शी, वैतरणी, तारकधारा, सेरीकल्चर, आत्मनिर्भर, चरमोत्कर्ष, ईश्वरोपासना, रूढ़िवादी, अपशकुन, दहेजलोभी, ओझागिरी, जादूटोना-टोटका, लोकनिंदा, तार्किकता, संकल्प, कमला मैया, जिजीविषा, अंधविश्वास, यौन चेतना, विद्रोही स्वरूप, सशक्तीकरण आरन्हीं।

¹ सहायक प्राध्यापक सह विभागाध्यक्ष, विश्वविद्यालय अंगिका विभाग, तिलकामाँझी भागलपुर विश्वविद्यालय, भागलपुर - 812007, बिहार

✉ डॉ० गौतम कुमार यादव

भारतीय संस्कृति करो मूल अवधारणा में नारी के शक्तिस्वरूपा, अधिष्ठातृ मानलो गेलो छै। नारी मानव ही नै बलुक मानवता रो जन्मदातृ छिकै। प्राचीन वैदिक संस्कृति में के बड़ी सम्मान आरो स्वतंत्रता प्राप्त छेलै। नारीसिनी धार्मिक अनुष्ठानो में भाग लै रहै आरो शास्त्रार्थ भी करै रहै। ऋषि याज्ञवल्क्य के चकित करी दैवाली गार्गी आरो शंकराचार्य के शास्त्रार्थ में पराजित करैवाली मंडन मिश्र रो पत्नी उभय भारती रो कथानक जग जाहिर छै। ईश्वर ने जबे सृष्टि के रचना करे लागलै, तबे सृष्टि के पूर्णता प्रदान करै लेली मनु आरो शतरूपा के पृथ्वी पे लानलकै। सृष्टि के अस्तित्व नारी से शुरू होलै। नारी समाज आरो सृष्टि के आधार छिकै। हमरो शास्त्रसिनी में नारी के आध्यात्मिकता करो प्रतीक मानलो गेलो छै।

रामायण भारतीय संस्कृति आरो धार्मिक जीवन करो अत्यन्त महत्वपूर्ण ग्रंथ छिकै। रामायण कथानक में नारी करो स्थान महत्वपूर्ण छै, केन्हे कि एकरा में नारी के भूमिका केवल एकटा पात्र के रूपो में नै, बलुक संस्कृति, प्रकृति आरो समाज रो विभिन्न पहलू के दर्शाबै वाला प्रतीक के रूपो में छै। भारतीय सभ्यता आरो संस्कृति में नारी के पूजलो जाय छै, जबे कि प्रकृति के माता के रूपो में सम्मानित करलो जाय छै। नारी करो संबंध संस्कृति आरो प्रकृति के बीच गहरा आरो निरंतर परिवर्तनशील संबंध के तरह होय छै। ई दोनो तत्व समाज में केन्द्रीय भूमिका निभाबै छै। रामायण में नारी के प्रकृति से गहरा रूपो में जोड़लो गेलो छै। सीता के पृथ्वी के बेटी के रूपो में प्रस्तुत करलो गेलो छै, जे ई संकेत करै छै कि नारी आरो प्रकृति के बीच गहरा संबंध छै। सीता के भूमि से उत्पन्न होना आरो भूमि में समाहित होय जाना, ई एकटा प्रतीक छिकै, जे नारी के स्वाभाविक रिश्ता पृथ्वी आरो प्रकृति के साथ दर्शाबै छै। यै ब्रह्मांड में विद्यमान एकटा सत्य जेकरो प्रतिनिधि नारी अर्थात् प्रकृति जे समस्त संसार रो जननी छिकै। नारी सृजनात्मक शक्ति करो प्रतीक छिकै, जेकरा बिना जीवन रो कल्पना करना असंभव छै। नारी प्रकृति करो ही पर्यायवाची रूप छिकै, केन्हे कि ओकरा में प्रकृति जैसनो कयेकटा गुण — धैर्य, क्षमा, करुणा, सहनशीलता, वात्सल्य स्त्रीत्व से जुड़लो छै। प्रकृति के शक्ति आरो सौंदर्य के अक्सर नारी के साथ जोड़लो जाय छै। नारी करो प्रजनन क्षमता आरो पोषण के शक्ति के प्रकृति के शक्ति से तुलना करलो जाय छै। वैदिक साहित्य में नारी के पृथ्वी, उर्वरा आरो प्रकृति के रूपो में चित्रित करलो गेलो छै। नारी आरो प्रकृति दोनो के 'शक्ति' करो प्रतीक मानलो गेलो छै, जे सृजन आरो विनाश दोनो में भूमिका निभाबै छै। पृथ्वी माता गंगा, यमुना नदी आरनी के नारी रूप में सम्मानित करलो गेलो छै।

साहित्य समाज के सिर्फ दर्पण ही नै, बलुक ओकरो भविष्य के पदचिह्न भी होय छै। जबे हमरासिनी अंगिका जैसनो आंचलिक भाषा के साहित्य रो बात करै छियै, ते हमें वास्तव में ऊ विशाल जनसमूह करो धड़कन के समझ के प्रयास करै छियै, जे गंगा के कछारो से लै करीके संथाल परगना के पहाड़ो ताय फैललो होलो छै। अंगिका उपन्यास साहित्य पिछला कुछ दशको से जे उन्नति-प्रगति करने छै ओकरा में नारी केवल एकटा पात्र के रूपो में नै, बलकु एक दृष्टि के रूपो में उभरलो छै। यहाँ नारी चेतना करो अर्थ केवल पश्चिमी फेमिनिज्म से नै छै, बलुक ई अपनो जड़ो से जुड़लो पितृसत्ता से टकरते आरो अपनो अस्तित्व लेली संघर्ष करते होलो ऊ महिला रो कहानी छिकै, जे खेतो से लै करीके खलिहान ताय आरो चूल्हा से लै के चौपाल ताय आपनो उपस्थिति दर्ज कराय रहलो छै। बिहुला से आधुनिक नारी ताय अंग प्रदेश करो संस्कृति में नारी के छवि द्वैध रहलो छै। एक तरफ सती बिहुला करो धरती छिकै, जहाँ त्याग आरो पतिपरायणता के चरम आदर्श मौजूद छै, ते दोसरो तरफ ई भूमि मंजूषा कला आरो लोक गीतो के ऊ उर्बर भूमि छिकै, जहाँ नारी आपनो कला के माध्यम से समाज के नियंत्रित करी रहलो छै।

अंगिका उपन्यासो के शुरुआती दौर में (1970-75) के आसपास नारी चेतना दबलो होलो छेलै। उपन्यासो में स्त्री, पुरुष पात्रो के सुख-दुःख के सहयोगी मात्र छेलै, हालाँकि जैसे-जैसे आंचलिकता के प्रभाव बढ़लै, ते लेखकसिनी महसूस करे लागलै कि अंगिका समाज के असली सच तब ताय अधूरा छै, जब ताय स्त्री के आवाज के नै सुनलो जाबे सके। हुनी परिवार के धूरी ते छेबे करै, मतरकि निर्णय प्रक्रिया से बाहर रहै छै। कयेकटा उपन्यासो में देखैलो गेलो छै कि किशारीसिनी करो विवाह वृद्ध या अयोग्य पुरुषो से करी देलो जाय छै। यहाँ पे नारी चेतना ओकरो मौन रुलाई में छिपलो रहै छै, जे बादो में आक्रोश बनी के फूटै छै। दहेज अंगिका समाज रो एकटा अभिशाप रहलो छै। अंगिका उपन्यासो में एहिनी अनेक पात्र छै, जे दहेज रो कारणे घर से निकाली देलो

जाय छै या होकरो मानसिक रूप से शोषण होय छै। यै परिस्थिति में जबे पलटी के जवाब दै छै ते वही से चेतना के उदय होय छै।

नारी चेतना पे आधारित अंगिका उपन्यास के कुछेक नारी पात्र रो संघर्ष गाथा के चर्चा ध्यातव्य छै—

अंतहीन वैतरणी

डॉ. आभा पूर्वे के लिखलो अंगिका उपन्यास 'अंतहीन वैतरणी' में ऐहनो नारी के संघर्ष, त्याग आरो आत्मनिर्भरता केरो मर्मस्पर्शी बखान होलो छै। अंगिका साहित्य के कयेकटा उपन्यासों में यै तरह के परिस्थिति देखैले मिलै छै कि नारी के शारीरिक आरो मानसिक प्रताड़ना कोय-न-कोय रूपों में हुनको ससुराल में करलो जाय छै। अंतहीन वैतरणी उपन्यास में नायिका बच्ची के हुनको पति सेमल, सास आरो ससुर द्वारा जे प्रताड़ना मिलै छै, ऊ कोय सभ्य नारी लेली समझौता करना बड्डी कठिन छै। लेखिका ने नारी के तुलना अंतहीन वैतरणी से करले छै। वैतरणी एक कर्मकांडीय धार्मिक अवधारण से सृजलो एकटा नदी केरो नाम छिकै। धार्मिक अवधारणा के अनुसार जबे मनुष्य के मृत्यु होय जाय छै, होकरो आत्मा के हय वैतरणी नदी के पारी करीके यमलोक पहुँचै ले पड़ै छै आरो वैतरणी नदी के पार करीके ऐला से ऊ आत्मा के धर्मराजे स्वर्ग भेजै छै। यै लेली श्राद्ध में गो-दान भी करबैलो जाय छै, ताकि ऊ बछिया के पूछ पकड़ी के वैतरणी पार करी जाय। वैतरणी मरलो मनुष्य के तारी दै छै, मगर मनुष्य के करलो पाप से ग्रसित होयके ओकरो तारकधारा हरदम विकल रहै छै। मनुष्य के ते त्राण दे दै छै, मगर अपनो त्राण लेली छटपटैते रहै छै। ई वैतरणी नदी के (पीड़ा के) अंत नै छै। ई सुदीर्घ नदी छिकै। उपन्यास के नायिका बच्ची के जीवन ठीक वैतरणी रं छै। यहे वैतरणी छिकै, नारी-नारी के नियति, नारी के प्रारब्ध।

'अंतहीन वैतरणी' पितृसत्तात्मक समाज में एक नारी के संघर्ष, त्याग आरो अंततः होकरो आत्मनिर्भरता के एकटा मर्मस्पर्शी गाथा छिकै। ई उपन्यास केवल एक कहानी के रूपों में नै, बलुक नारी चेतना के विभिन्न आयामों के उकरै वाला एकटा जीवन्त दस्तावेज छिकै। अंतहीन वैतरणी उपन्यास के नायिका 'बच्ची' के माध्यम से लेखिका ने नारी जीवन केरो विडम्बना आरो होकरो चेतना के विकास के क्रमिक रूपों से देखने छै। एकरा में नारी चेतना के निम्नलिखित बिन्दु प्रमुखता से उभरलो छै—

1— उपन्यास में बच्ची एकटा शिक्षित पात्र छिकै। जबे होकरो वैवाहिक जीवन पति सेमल द्वारा उपेक्षा आरो संवदेनहीनता के कारण बिखरे लागले, ते हुनी अपनो पिता जानकी प्रसाद के सहयोग से अपनो पढ़ाय जारी रखै छै आरो आई.ए. के परीक्षा पास करी जाय छै। यहे शिक्षा हुनको भीतर चेतना जगाय छै, जेकरा से ऊ बादो में सेरीकल्चर विभाग में सरकारी नौकरी प्राप्त करीके आत्मनिर्भर बने छै। ई कदम तत्कालीन समाज में नारी के अपनो अलग पहचान बनाय लेली छटपटाहट के दर्शाय छै।

2— नायिका बच्ची के चरित्र भारतीय नारी के वै पारंपरिक रूपों के भी देखाय छै, जे परिवार के मर्यादा आरो सुख लेली अपनो सब कुछ न्योछावर करी दै छै। ससुराल के बदहाल आर्थिक स्थिति के सुधारै लेली हुनी अपनो स्त्री-धन गहना सहित हाथों के चूड़ी तौय दे दै छै। बच्ची के पति सेमल ने हुनका साथ दुर्व्यवहार आरो आर्थिक शोषण (सरकारी सेवा के दौरान हुनको वेतन उठाय लेना) करला के बावजूद हुनी बड्डी समय तौय धैर्य बनैने राखलकै।

3— उपन्यास में सेमल केरो चरित्र एकटा शोषक पति के रूपों में चित्रित करलो गेलो छै, जे कि पत्नी के सिर्फ संपत्ति आरो धन प्राप्ति केरो साधन मात्र समझै छै। वै नै सिर्फ बच्ची के मायके से मिललो संपत्ति पे नजर राखै छै, बलुक अंत में बंदूक के नोको पर हुनका से हवेली आरो जग्घो-जमीन अपनो नामों से करवाय लै छै। शोषण के चरमोत्कर्ष क्षण में भी बच्ची ने अपनो परिचय देते हुवे नै सिर्फ हुनका संपत्ति सौंपी देलकै, बलुक अपनो कोखी के संतान बेटा अश्वघोष पर से भी अपनो अधिकार त्यागी के सेमल केरो अहंकार के आईना देखैलकै। नायिका बच्ची केरो त्याग एकटा मौन विद्रोही छेलै। बच्ची रो अपनो बेटासिनी (रजनीगंधा आरो बिजली) रो प्रति प्रेम हुनको चेतना के एकटा आरो पक्ष छै। पैहलो बेटा रजनीगंधा के इलाज अभाव में मृत्यु, हुनका तोड़ी दै छै, मतरकि हुनी हार नै मानलकै। बच्ची अपनो दम्भो पे दोसरी बेटा (बिजली) आरो बेटा (अश्वघोष) केरो पालन-पोषण करै छै। बी.डी.ओ. श्रीवास्तव बाबू के सहयोग से बिजली बेटा के शादी एकटा सुयोग्य घर में सुनिश्चित करीके अपनो नैतिक दायित्व से मुक्त होयके संसार से विरक्ति

आरो शांति के तलाश में काशी चलो जाय छै। ऊपर वर्णित तथ्यों से स्पष्ट होय छै कि उपन्यास रो शीर्षक अंतहीन वैतरणी नारी जीवन के अंतहीन कष्टो आरो संघर्षो के प्रतीक छिकै।

भदवा चंदर

उपन्यासकार सुरेन्द्र प्रसाद यादव के लिखलो अंगिका उपन्यास 'भदवा चंदर' व्यक्तित्व विशेष पर विवरणात्मक शैली में लिखलो उपन्यास छिकै। जै में एकटा शिशु के जन्म से ले करीके जन्मकालीन प्राकृतिक परिस्थिति के कारण ओकरो 'भदवा चंदर' नामकरण ओकरो माय-बाप के उत्साह, आकांक्षा, ओकरो पालन-पोषण, ओकरो तेजस्विता, प्रथम श्रेणी में मैट्रिक पास करला के बाद गामो के मुखिया छल-प्रपंच के कारण कॉलेज में नाम लिखाबै में असफलता, हारी-फारी के अपनो भक्त भजनिया पिता धनुकलालो के संपर्क में रहीके आत्मा-परमात्मा, तपस्या, ईश्वरोपासना में रमी गेला के बाद आपनो बाल-सहचरी सरबतिया आरो माय-बाप के छोड़ीके भदवा चंदर गाँव के छोड़ी नेपाल परेला के बाद गामो में माय-बाप, गोतिया-लैया आरो सरबतिया आरन्हीं के असीम पीड़ा केरो वर्णन करलो गेलो छै।

'भदवा चंदर' नै केवल एकटा आंचलिक कथा छिकै, बलुक ई ग्रामीण परिवेश में नारी चेतना के बदलते स्वरूप रो एकटा जीवन्त दस्तावेज भी छिकै। एकरा में स्त्री पात्रो के माध्यम से लेखक ने समाज रो रूढ़िवादी पितृसत्तात्मक दबाव आरो ओकरो विरुद्ध उठते आत्मनिर्भरता के आवाज के बड़ी प्रखरता से उद्घाटित करने छै। ई उपन्यास में नारी चेतना के पैहलो स्वर विधवासिनी के सामाजिक स्थिति के रूपो में उभरै छै। उपन्यासकार ने समाज के दोहरा चरित्र पे प्रहार करने छै, जहाँ पति के मृत्यु के होला के बाद नारी के बेचारी या अपशकुनी मानीके होकरो सिंगार, खुशी आरन्हीं के छीनी लेलो जाय छै। अरुणा आरो रीना जैसनो पात्रो के दुःख ई छै कि ओकरो अपनो ही समाज ओकरा डायन कहीके प्रताड़ित करै छै। ई चित्रण दर्शाय छै कि नारी चेतना करो मार्ग सामाजिक वर्जना के काँटो से भरलो होलो छै। ई उपन्यास के सबसे सशक्त पक्ष तब सामना आबै छै जब नारी अत्याचार सहै के बजाय विद्रोह के मार्ग चुनै छै। वीणा, स्वाति आरो सुनीता जैसनो पात्र ई नया चेतना के प्रतीक छिकै। वीणा देहजलोभी पति के छोड़ीके अपनो बेटी के पालन-पोषण अकेले करै छै आरो समाज में सम्मान पाबै छै। स्वाति स्पष्ट कहै छै कि हुनी अपनो पति के ये लेली छोड़ले छै कि ऊ देह-व्यापार जैसनो अनैतिक कार्य में संलिप्त रहै छै। गुलिया देवी जैसनो अनपढ़ महिला भी सात बार बीहा करै लेली विवश होय छै, कहै कि ऊ पति के मार सहै लेली तैयार नै छेलै। एकरा से स्पष्ट होय छै कि अंग क्षेत्र केरो महिलासिनी अबे अपने आप के त्यागलो होलो नै मानीके पुरुषो के ओकरो द्वारा त्यागलो गेलो माने लागलै छै। 'सरबतिया' ई उपन्यास के धूरी छिकै, हुनी केवल भदवा चंदर केरो प्रतीक्षारत प्रेमिका नै छिकै, बलुक हुनी ज्ञान आरो विवेक रो भी प्रतीक छिकै। हुनी उपन्यास में मँहगी राजकुमारी के लोककथा रो माध्यम से नारी के भाग्य आरो पुरुषार्थ के दर्शन के स्पष्ट करै छै। मँहगी के यह कहना कि 'हर कोई अपनो भाग्य से खाय छै', पिता के अहंकार के चुनौती दै छै। अंत में सरबतिया आरो भदवा चंदर दोनो साथ-साथ कंधा से कंधा मिलाय के गाँव में शिक्षक-शिक्षिका के रूपो में कार्य करना नारी चेतना के पूर्णता के दर्शाय छै।

नटुआ दयाल

डॉ. विद्या रानी के लिखलो अंगिका उपन्यास 'नटुआ दयाल' अंग महाजनपद के लोककंठ में व्याप्त 'नटुआ दयाल' लोकगाथा पे आधारित छै। टोटका, जादू-टोना, तंतर-मंतर-जंतर, डायनपनो, ओझागिरी, नजर-गुजर के साधना, क्रिया-कलाप के घात-प्रतिघात से गढ़लो हय उपन्यास के आधार ते नटुआ दयाल लोकगाथा छेबे करै, एकरो साथे अपनो भक्त-भक्तिन लेली देवी कमला मैया के कृपा भी दृष्टिगोचर होय छै। उपन्यास में नटुआ के संघर्ष आरो ओकरो कला के ईर्द-गिर्द बुनलो गेलो छै, मतरकि सूक्ष्म विश्लेषण करला पे एकरा में नारी चेतना के विभिन्न आयाम जैसे-ममता, संघर्ष, लोक भय आरो समर्पण प्रमुखता से उभरै छै। उपन्यास में नारी चेतना के मुख्य रूप से तीनटा स्त्री पात्रो के माध्यम से समझलो जाबे सके—(क) बहुरा (नटुआ के सास), (ख) अमरौतिया (नटुआ के पत्नी) आरो (ग) भागोवंती (नटुआ के बहिन)।

(क) बहुरा : शक्ति आरो लोक-लाज के द्वंद्व — बहुरा ई उपन्यास के ऐसनो पात्र छेकै, जेकरा समाज ने डायन घोषित करी देने छै। यहाँ पे नारी चेतना के एकटा नकारात्मक मतरकि यथार्थवादी पक्ष दिखै छै, जहाँ एक असकल्लो नारी अपनो सुरक्षा आरो अपनो बेटी के भविष्य लेली तंत्रविद्या के सहारा लै छै। ओकरो चेतना में अपनो बेटी अमरौतिया के विवाह आरो ओकरो सुरक्षित भविष्य सर्वोपरि छै। हुनी लोकनिंदा सहते हुवे भी समाज के सामने झुकै छै आरो अपनो बेटी के घर बसाय लेली

‘हथपकड़ा’ विवाह जैसनो साहसिक कदम उठाया है। ई हुनको ममतामयी चेतना ही छिकै जे ओकरा समाज सँ लड़े के शक्ति दै छै।

(ख) अमरौतिया : मौन समर्पण आरो आत्मिक शक्ति – अमरौतिया उपन्यास के नायिका छिकै आरो हुनी पारंपरिक नारी चेतना के प्रतिनिधित्व करै छै। हुनको व्यक्तित्व धैर्य आरो अटूट प्रेम सँ निर्मित छै। विवाह के मात्र तीन दिनो के मिलन के बाद ही बारह बरसो तौय विरह के अग्नि में जलै छै, जे ओकरो चारित्रिक दृढ़ता के दर्शावै छै।

नैतिक बोध – हुनी जानै छेलै कि हुनको माय बहुरा डायन छिकै, हुनको पति नटुआ दयाल के जीवन के खतरा छै। यहाँ हुनको चेतना आरो अपनो माय के प्रति निष्ठा आरो पति के प्रति प्रेम के बीच झूलै छै, जहाँ हुनी अंततः पति के रक्षा के मार्ग चुनै छै।

धैर्य – बारह बरसो तौय लंबा इंतजार पति के लेली हुनको मानसिक शक्ति के परिचायक छिकै। हुनी विरह में वनबेल खायके भी अपनो सतीत्व आरो प्रेम के रक्षा करै छै।

(ग) भागोवंती : सक्रिय आरो तार्किक चेतना – नटुआ दयाल के बहिन भागोवंती ई उपन्यास में सबसे अधिक सक्रिय नारी चेतना के रूपो में उभरै छै।

तार्किकता : जबे पूरा समाज नटुआ दयाल के मृत मानिके श्राद्ध कार्य लेली तुलै छै, तबे भागोवंती ने अपनो बुद्धिमत्ता सँ ऊ पाखंड के रोकलकै। हुनी तर्क दै छै आरो योजना बनायके आपनो माय-बाप के आर्थिक आरो मानसिक शोषण सँ बचाव छै।

आस्था आरो संकल्प : हुनको चेतना में लोकदेवता ‘कमला मैया’ केरो प्रति अटूट विश्वास छै, जे कि कमला मैया सँ केवल प्रार्थना ही नै करै छै, बलुक हठ भी करै छै, हुनको यह दृढ़ चेतना नटुआ दयाल के खोज रो माध्यम बनै छै।

लोक संस्कृति, प्रकृति आरो नारी : उपन्यास में नारीसिनी के सामूहिक रूप मैनी, सुग्गी, सोनामंती आरन्ही लोक चेतना के व्यक्त करै छै। जहाँ मैनी, सुग्गी जैसनो नारीसिनी समाज के चपल आरो जिज्ञासु चेतना के देखावै छै, वहीं सोनामंती जैसनो सहेली विरह के समय में संबल प्रदान करै छै। नटुआ दयाल उपन्यास में लेखिका ने नारीसिनी के केवल पुरुषो के सहायक रूपो में नै, बलुक कहानी के गति दै वाली निर्णायक शक्ति के रूपो में चित्रित करने छै। चाहे ऊ बहुरा के अपनो बेटी लेली समाज सँ टकराना रहे या अमरौतिया के बारह बरसो के मौन तप रहे या भागोवंती के तर्कपूर्ण संघर्ष कृत्य-सम्भे स्थिति सिद्ध करै छै कि लोकगाथा के केन्द्र में नारी रो अटूट जिजीविषा आरो ओकरो चेतना ही विद्यमान छै।

अंगिका उपन्यासो में नारी चेतना के विविध आयाम

(क) शैक्षणिक चेतना – आधुनिक अंगिका उपन्यासो में बेटी के पढ़ाव के संकल्प एकटा प्रमुख कथानक बनी गेलो छै। शिक्षा के माध्यम सँ नारीसिनी अंधविश्वास आरो रूढ़ि के तोड़ी रहलो छै, हुनी अबे ई सवाल पूछै छै कि वंशावली पंजी में ओकरो नाम कहने नै होतै? हुनको अंदर अबे दुनिया देखै के सपना छै। नौकरी-चाकरी लेली हुनी अबे प्रयासरत भी दिखै छै। ध्यातव्य छै कि अनुपलाल मंडल के लिखलो उपन्यास ‘नया सूरज : नया चॉन’ के नायिक प्रभावती रहे या फिर डॉ. मृदुला शुक्ला के लिखलो उपन्यास ‘फिनिक्स’ के नायिका गंगा यैसिनी नारी पात्र के अंदर शैक्षणिक चेतना रो अंश दिखै छै।

(ख) दैहिक आरो यौन चेतना : ई एकटा संवेदनशील विषय रहलो छै, जेकरा अंगिका लेखकसिनी ने कुशलता सँ छूने छै। पारंपरिक समाजो में नारी के यौन-इच्छा के पाप मानलो जाय छेलै, मतरकि समकालीन उपन्यासो में नारी के प्रेम, विरह आरो ओकरो शारीरिक इच्छा के मानवीय धरातल पे चित्रित करलो गेलो छै। ऊ आबे देवी नै, बलुक इंसान बनै लेली चाहै छै। डॉ. आभा पूर्व के लिखलो अंगिका उपन्यास ‘गुलबिया’ ग्रामीण पृष्ठभूमि में नारी चेतना के एकटा अत्यन्त जटिल आरो विद्रोही स्वरूप के प्रस्तुत करै छै।

(ग) राजनैतिक आरो सामाजिक चेतना : पंचायती राज्य व्यवस्था के बाद अंगिका उपन्यासो में यै तरह के पात्रसिनी के भरमार होय गेलो छै, जे आयको समय में मुखिया या सरपंच जनप्रतिनिधि के तौर पे चुनलो जाय छै। हालाँकि शुरुआती दौर में हुनको पति (मुखियापति या सरपंचपति) राज करै छै, मतरकि उपन्यास के अंत में अक्सर नारी के वास्तविक सशक्तीकरण के साथ होय छै, जहाँ हुनी अपनो मोहर के महत्त्व के समझी जाय छै।

(घ) भाषा के सौंदर्य आरो नारी रो अभिव्यक्ति : अंगिका भाषा में एकटा शब्द छै 'गुमान'। उपन्यासों में नारी जबे अपनो गुमान (स्वाभिमान) के बात करै छै, तेँ ऊ हुनको चेतना के शिखर होय छै। यहाँ के गाली, लोकगीत आरो मुहावरा नारी के औजार छिकै। जबे वें कोहवर में गाय छै, तेँ सृजन के बात करै छै। मतरकि जबे वें समदाउन (विदाई गीत) गाय छै, तेँ वें समूचे व्यवस्था पेँ सवाल खाड़ो करी दै छै।

संदर्भ ग्रंथ:

- पूर्व, आभा. *अंतहीन वैतरणी (अंगिका उपन्यास)*. अंगिका संसद, भागलपुर, 2022.
- पूर्व, आभा. *गुलबिया (अंगिका उपन्यास)*. अंगिका संसद, भागलपुर, 2022.
- मंडल, अनूपलाल. *नया सूरज: नया चॉन (अंगिका उपन्यास)*. शेखर प्रकाशन, पटना, 1979.
- यादव, सुरेन्द्र प्रसाद. *भदवा चंदर (अंगिका उपन्यास)*. अंगिका संसद, भागलपुर, 2007.
- यादव, गौतम कुमार. *अंगिका उपन्यास साहित्य: एक विश्लेषणात्मक अध्ययन (शोधप्रबंध)*. तिलकामांझी भागलपुर विश्वविद्यालय, भागलपुर, 2018.
- रानी, विद्या. *नटुआ दयाल (अंगिका उपन्यास)*. शब्द सृष्टि, दिल्ली, 2010.
- 'स्मारिका', दर्शन परिषद्, बिहार, 46वाँ वार्षिक अधिवेशन, 2024, चिंतनधारा : नारी, संस्कृति और प्रकृति, पंजीयन संख्या 609 / 14-15.
- शुक्ला, मृदुला. *फिनिक्स (अंगिका उपन्यास)*. अंगिका संसद, भागलपुर, 2005.